

P.P.A TA RECORDA E DI 40 AÑA DI FAYECIMIENTO DI JUAN ENRIQUE IRAUSQUIN

ORANJESTAD(AAN)- Awe 20 di Juni 2002, ta exactamente 40 aña cu Todopoderoso a tuma Sr. Juan Enrique Irausquin q.e.p.d. fundador di Partido Patriotico Arubano, motor di economia Arubano y tata di nos turismo den su Reino.

40 Aña pasa cu Aruba a perde un gran yiu di tera cu su presencia mei mei di nos a nifica un periodo dinamico di trabao, vision y produccion na bienestar y progreso di nos Pais Aruba.

Si, den su tempo su vision di un Aruba para economicamente y socialmente riba su propio pianan cu un industria di Turismo como e pilar di nos economia tabata worde cuestiona pa su contrincantenan politico, awe historia a determina cu E tabata tin razon!

Si, den su tempo su vision di un Aruba cu un industria di turismo como e pilar di nos economia lo tabata salbacion di nos pueblo na momento cu Lago a cera su portanan, awe historia a determina cu ta e Sr. Juan Irausquin a salba Aruba na momento cu Lago a cera su portanan!

Si, den su tempo su vision pa no acepta Interrimregeling, pasobra e lo a hinca Aruba den un Antiyas di 6 pa hopi aña tabata worde cuestiona y hasta hari, awe historia a determina cu e a haya razon, e decision pa acepta Interim-regeling tabata un decision incorrecto!

Si, den su tempo su vision y su plannan riba tereno social-economico tabata e prome pasonan di un maneho "social democrata", na unda den curso di añanan nos hubentud tabata tin oportunidad pa sigui enseñanza na un forma "igual" y cu tanto nos poberman por a cobra "onderstand" y nos grandinan por a cobra un "pensioen" ta su labor!

Directiva y Consejo di Partido PPA ta recorda su contribucion na pais Aruba, Antiyas y nos organisacion politico PPA cu tur respet cu un lider, un politico y mas cu tur un estadista cu todopoderoso a tuma den su reino merece.

Awe, dia 20 di Juni directiva y miembronan di consejo di PPA lo pone un krans na su estatua na Juanchito Irausquinplein pa 4.45 p.m.



JUAN ENRIQUE IRAUSQUIN

Juan Enrique Irausquin a nace na Aruba, dia 3 di December 1904. Despues di lagere school na Aruba el a bay Corsow na unda el a sigui diferente curso den educacion comercial y tambe den accounting, money and banking. Na edad di 14 aña el a drenta servicio di Hollandsche Bank y den un tempo relativamente cortico a yega te na procuratiehouder.

Impulsa pa un ambicion di superacion, Sr. Irausquin na 1929 a tuma retiro for di Hollandsche Bank y a drenta servicio di firma John Gerard Eman, cu durante algun tempo tabata haci negoshi bancario.

Na 1936 e firma John Gerard Eman den cooperacion cu Maduro & Curiels Bank NV a dicidi di funda e prome Banco Arubano, esta Aruba Bank N.V.

Juanchito, manera popular-

mente tabata wordo yama, a bira su Director. Posicion cu el a ocupa te na 1951. Sr. Irausquin tabata activo ariba hopi tereno. E tabata presidente di Camara di Comercio, di Comision di Turismo y miembro di hopi comision economico, cofundador di Rotary Club y Home Building Foundation na Aruba.

Na 1974 el a bira miembro di Staten y despues a sali eligi den tur eleccion na cual el a tuma parti. Varios biaha el a worde nombra presidente di Staten den reconocimento pa su capacidatnan parlamentario. For di aña 1948 Juanchito a participa na tur conferencia importante tocante autonomia pa Antiyas Neerlandes, manera Ronde Tafel Conferentie y e asina yama Klein Commissie.

Na 1949 Juan Enrique Irausquin a funda Partido Patriotico Aruba (PPA). Den e promer eleccion pa Eilandsraad na Aruba, Juanchito a sali eligi, kedando miembro di e raad aki pa varios aña.

Su partido a keda den oposicion te na aña 1954.

Dia 1 di April 1956 Juan Enrique Irausquin a wordo nombra Ministro di Finanzas y Fomento, puesto importante cu el a keda ocupa te na su morto riba 20 di Juni 1962. Den reconocimento pa su hopi meritonan riba tereno politico, economico y social, Su Mahestad La Reina Juliana a haya bon di nombre Officier den Orde di Oranje Nassau.

Aruba y Antiyas Neerlandes en general a

honra memoria di e ilustre Arubano inaugurando un estatua riba e pleinchi dilanti Postkantoor y honrando e cu su nomber "Juan Enrique Irausquinplein".

Gobierno di Aruba a duna e caya cual el a construi y tabata e infraestructura necesario pa e construccion di hotelnan su nomber na 1992.

Vliegvel di Saba y un caya riba St. Maarten tambe ta carga su nomber coo reconocimento di su contribucion na nan desaroyo y progreso. Servicio Postal di Aruba dia 1 di Januari 1995 a sa di honra su memoria cu un stampia special na bolor di 100 cent.

Na conmemoracion di e di 50 aña di existencia di Partido Patriotico Arubano ta un deber sagrado y un obligacion di su dirigentenan pa dedica algun palabra di reflexion na e gran figura Arubano fundador di PPA y motor tras di economia Antiyano y Arubano.

Nos directiva kier acentua cu e motibonan di Juan E. Irausquin q.e.p.d. pa funda PPA tabata hustamente e principianan sagrado di un Arubano cu ta stima su isla y no a desea pa esaki bay mas profundo den colonialismo cu ya caba e tabata meti.

Historia ta dicta cu na momento cu tabata kier a humiya Aruba, cu caracter Juanchito a sali na defensa di su isla y a propina nan un golpi.

Su nomber, labor, actitud, caracter, cu sentimiento pa problemanan di e ser humano den comunidad, tur esaki y mucho mas a hibe den tur skina di Aruba.